

# History of Bodo Literature From 1952 to 1990 Poetry Section

Karen Basumatary  
Bengtol College, Bengtol

बर' थुनलाइनि जारिमिनखौ नायोब्ला गोजाम मुगा थामहिनबा 1920 माइथायनिफ्राय 1951 माइथायसिमनि गेजेरावबो थुनलाइनि गुबुन गुबुन बाहागोफोरनि गेजेराव बै समनि गोबां गागि आरो गागि नडै लिरगिरिफोरखौ बांसिनै खन्थाइ लिरनानै बर' थुनलाइखौ सिबिनानै आबुं खालामनाय नुनो मोनो। बेबायदिनो गोदान मुगा थामहिनबा 1952 माइथायनि उनावबो गोबां लाइसि बिसम्बिफोरनि गेजेरजों आरो खायसेया बिजाब महरैबो माखासे गागि आरो गागि नडै लिरगिफोरनि रेबगननिफ्राय बांसिनै खन्थाइ सोरजिनायखौनो नुनो मोनो। 1952 माइथायनिफ्राय 1990 मायथाइसिमनि गेजेरावबो बेबायदिनो बर' थुनलाइनि बाख्रिआव गोबां गागि आरो गागि नडै लिरगिरिफोरनि रेबगननिफ्राय बायदि थाखोनि खन्थायफोरा गुबुन गुबुन लाइसि बिसम्बिफोरनि गेजेरजों आरो खायसेया बिजाब महरैबो नुजानो खाबु मोनो।

इं 1952 मायथायाव खालि कुमार लाहारिनि गेदेरथार सोरजि "खन्थाय बिहुं" खन्थाय बिजाबा ओंखारो। बिथाडा अलंबार मुगानिफ्राय जागायनानै गोदान मुगासिम खन्थायनि गेजेरजों बर' थुनलायाव गोबां बिहोमा होलांदों। बिथानि खन्थायनि गेजेरजों हारि फोजाखांनाय, सोंखारिनाय, इसोरखौ मोजां मोननाय, रमान्टिक, मिथिंगाखौ मोजां मोननाय बायदि सानस्रिया रोखा रोखायै बेरखाडो। बेबायदिनो बे माइथायावनो देंखोगिरि जोहोलाव नीलेस्वर ब्रह्मनि "बालाबगानै" खन्थाय बिजाबा ओंखारो। बेयावहाय बिथाडा गावनि रनसायनाय माखासे मेथाइ आरो खुगा मेथाइफोराबो दंफायो।

इं 1954-55 माइथायाव प्रसेनजित ब्रह्मनि "आं थैया" आरो समर ब्रह्म चौधुरिनि "सिजौ गेरेमसा" बे गांनै खन्थाइआ ओंखारो। प्रसेनजित ब्रह्मनि "आं थैया" खन्थाया दोसे गोजौ थाखोनि बिग्रायनाय खन्थाइ। नोरजिया-निखावरि, सोबख'जानाय, नेवसिजानाय सुबुं आरो आबादारिनि निदाननि समाव अरायबो थुलुंगा महरै गसंथानो आरो थानानै थानो नाजानायानो "आं थैया" खन्थायनि गुबै फुंखा। गुबुन फारसेथिं समर ब्रह्म चौधुरिनि "सिजौ गेरेमसा" खन्थायाबो हारि फोजाखांनाय राफोद खन्थाय। मानोना बर' हारिया मिरौ जिरौवै थानानै थानायनि बाथ्राखौ बेरखांनाय नुनो मोनो।

इं 1958 माइथायाव समर ब्रह्म चौधुरिनि "रादाब" खन्थाय बिजाबा सेबखांजायो। बिथाडा

गावनि खन्थायाव गावनि असे अनजालिनि सानस्रिजों मिथिंगानि समायना महरखौ बरनायदों लोगोसे "रादाब" खन्थायनि गेजेरजों गावनि नंगुबै जिउनि गासिबो सावगारिखौ बेरखांहोनाय नुनो मोनो।

इं 1968 मायथायाव बानेस्वर बसुमतारीनि राफोद आखायजों सोरजिजानाय "दिमापुर" खन्थाय बिजाबा ओंखारो। बिथाडा गावनि खन्थायनि गेजेरजों हारिमायारि सानस्रि आरो जारिमिनारिनि सावगारि एरखांदों। बे एखे मायथायावनो प्रमद चन्द्र ब्रह्मनि गोख्रों सानस्रिजों सोरजिजानाय "सनाखि" खन्थाय बिजाबा सेबखांजायो। बिथाडा गावनि खन्थाय बिजाबाव गोजाम आरो गोदान आयदानि खन्थाय सुजुदों।

इं 1969 मायथायाव इस्वर चन्द्र ब्रह्म आरो कामाक्या ब्रह्म नारजारि बिथांमोनहा सानैजों जयै सुजुनाय "गुथाल" खन्थाय बिजाबा ओंखारो। बेबायदिनो बे एखे मायथायावनो बिद्यासागर नार्जारीनि "आं बावनो हाया" आरो शचीन बसुमतारीनि "मिथिंगानि देंखो" बायदि खन्थाय बिजाबफोरा ओंखारो। "गुथाल" खन्थाय बिजाबाव इस्वर चन्द्र ब्रह्मनि दों 19 आरो कामाक्या ब्रह्म नारजारिनि दों 11 खन्थायफोरखौ लाफानानै गासै दों 30 खन्थायफोरखौ मोननो हायो। बिथांमोननि खन्थायफोरनि गेजेरजों बर' हारिखौ खैफोदनि समाव बिखा फोरदाननानै आवगायलानो थुलुंगा होनाय आरो हारिखौ फोजौखांनो नाजानाय बाथ्राफोरखौ बेरखांनाय नुनो मोनो। बिद्यासागर नार्जारीनि "आं बावनो हाया" खन्थाइआव गावनि थार जाथायखौ बिथा खालामनानै आबुं रमान्टिक सानस्रिखौ फोरमायदों आरो शचीन बसुमतारीनि "मिथिंगानि देंखो" खन्थाइ बिजाबाव बै समनि मिथिंगानि बायदि बायदि महरखौ अदेबानि बै समनि बर' गामिफोराव बेरखांनाय मिथिंगानि सावगारिखौ समायनायै एरखांनायखौ नुनो मोनो।

इं 1970 मायथायाव गासै गांबा खन्थाय बिजाबफोरा ओंखारो। बेफोर जाबाय फारियै लकेन्द्र बसुमतारिनि "रिंखां"। बेयाव खन्थायगिरिया माहारि फोजाखांनायजों लोगोसे रमान्टिक सानस्रि बेरखांहोदों। उत्तम खेरखातारिनि "खन्थाइमाला", बानेस्वर बसुमतारीनि "जग्निबान"। बिथानि "जग्निबान" खन्थाय बिजाबाव माहारि फोजाखांनाय , जांख्रिखांनाय आरो हादर अनसायनायनि सानस्रिया बेरखांदों। महेस्वर नार्जारीनि "आरज मेथाय" आरो धरनिधर औवारिनि "मोदै" खन्थाय बिजाबफोरा ओंखारो। मैदै खन्थाइ बिजाबाव रमान्टिक सानस्रिजों लोगोसे क्लासिकेलबो नांजाबफानानै दं। बेबायदिनो बे बोसोरनि उन उन 1971 माइथायाव मन्थि ब्रह्म चौधुरिनि "गैया" खन्थाय बिजाबा सेबखांजायो। बिथाडाबो बर' थुनलाइनि फोथाराव "गैया" खन्थाय बिजाबनि गेजेरजोंनो गावखौ सासे राफोद खन्थायगिरि महरै गायसननो हादों।

इं 1973 माइथायाव हरिहर ब्रह्मनि दों 20 खन्थायफोरजों आबुं जानाय "सेउथि" आरो बिष्णुज्यथि कचारिनि "अरगें" गांनै खन्थाइ बिजाबाव ओंखारो। खन्थाइगिरि बिथाडा "सेथि" खन्थाइ बिजाबाव थानाय खायसे खन्थायफोरनि गेजेरजों हादर मोजां मोननाय आरो खायसे खन्थायफोरनि

गेजेरजों मिथिंगानि सायाव बिथा खालामनानै लिरनायखौ नुनो मोनो।

इं 1975 माइथायाव ओंखारनाय बर' खन्थायफोरनि गेजेराव मुंदांखा जानो हानाय खन्थाय बिजाबा जादों ब्रजेन्द्र कुमार ब्रह्मनि "अखां गंसे नांगौ"। बिथांनि खन्थाय बिजाबाव थानाय दोंफ्रोमबो खन्थाइफोरानो दिन्थि नेरसोन (Symbolic) बाहायनानै लिरनाय। बिथाडा जिउनि गोब्राबथि आरो फानजारिनिफ्राय उदां जानो गंसे उदां अखांनि मिजिंथिदों "अखां गंसे नांगौ" खन्थाइनि गेजेरजों। बे एखे मायथायावनो फुलेन बर'नि बिग्रायारि "लाइमोन" खन्थायाबो सेबखांजायो। बिथां खन्थायगिरिया "लाइमोन" खन्थायनि गेजेरजों बर' राव, हारिमु आरो हादरखौ गुबुन हारिफोरजों नारसिन जानायखौ नुनानै, बर' हारिनि अल'खद नुनानै खन्थायगिरिया बेफोर गोहोफोरनि हेंथायै जुजिनो हांखायदों।

इं 1976 मायथायाव माखासे खन्थाइगिरिफोरनि रेबगननिफ्राय खन्थाय सोरजिनाय नुनो मोनो। जेरैहाय- रामदास बर'नि "फैफिनो", नन्देसर बर'नि "गोसोनि बारहुंखा" बायदि। "फैफिन" खन्थाय बिजाबाव थानाय खायसे खन्थायफोरनि गेजेरजों खन्थायगिरि बिथाडा गावनि गोबोंनि हांखायनायखौ बेरखांहोदों। बेबायदिनो "गोसोनि बारहुंखा" खन्थाय बिजाबाव थानाय खायसे खन्थायफोरनि गेजेरजों खन्थायगिरि बिथाडा सुबुंनि दुखु, आंखाल आरो मोनजारोडै हालुवाफोरनि सायाव बिथा खालामनानै लिरनाय।

इं 1977 माइथायाव माखासे गागि लिरगिरिफोरनि रेबगननिफ्राय खन्थाय बिजाबफोरा ओंखारनो खाबु मोनो। जेरैहाय- मनरन्जन लाहारिनि गिबि सोरजि "माब्लाबा" खन्थाय बिजाबा ओंखारो। बानेस्वर बसुमतारीनि "जग्निबान", बर' खन्थाइनि जारिमिनाव सिगांसिन सनेट बाहागोनि खन्थाय शचीन बसुमतारीनि "सिमांनि खैना" खन्थाय बिजाबा सेबखांजायो। बिथांनि बे खन्थाय बिजाबाव गासै दों 42 सनेट खन्थायफोर दं। उत्तम खेरखातारिनि "खन्थाइ माला" आरो बरुन बर'नि "जोंमा" बायदि खन्थाय बिजाबफोरा ओंखारनो।

इं 1980 माइथायाव जगदीश ब्रह्मनि दों 12 खन्थायजों आबुं "दैमानि फिसा:दिमासा" खन्थाय बिजाबा सेबखांजायो। लोगोसेनो बे एखे मायथायावनो सानजारि बुथुवानि "जांख्रिखां" बायदि खन्थाय बिजाबा ओंखारो। बिनि उन उन 1981 माइथायाव रुपनाथ मोसाहारिनि "नेसॉन", गुनेसर मुसाहारिनि "हा फिसा हौवा", चन्द्र कान्थ बर'नि "जिउनि लामा" बायदि खन्थाय बिजाबफोरा सोरजिजायो। इं 1982 माइथायाव राफोद आखायजों खन्थाय लिरगिरि अन्जु नार्जारीनि "नोंनि जिउ आंनि बिबुंथि" खन्थाय बिजाबा ओंखारो। बिथांनि खन्थाइफ्रा जिउनि गोथौ सानस्रि गोनां।

इं 1984 माइथायनि गेदेर सोरजिथाइ आरो बिहोमाया जादों बिहुराम बर'नि "गिबि बिथाइ"। बे खन्थाय बिजाबखौ माखासे थुनलाइगिरिफोरा खोन्दो खन्थायमा होननाबो बुंदों। बे खन्थाय बिजाबाव बर'नि सोरांगिरि बाथौनि गुमुर, सोरजि सान्थौ आरो सानस्रिफोरखौ फोरमायदों।

बेबायदिनो जोबथारनायाव इं 1989 माइथायाव सुरथ नार्जारीनि गिदिर सोरजि "जिउनि अलंबार" खन्थाय बिजाबा ओंखारो। बिथांनि "जिउनि अलंबार" खन्थाइआ सोरजिगिरि अबंलावरिनि सायाव बिथा खालामना लिरनाय। अबंलावरिखौ सिबिनाय, आरज गाबनाय, गावनि जिउआव अबंलावरिनि सोरां लाबोनो अनसायनाय बायदि सानस्त्रिफोरानो बेरखांदों खन्थायफोरनि गेजेरजों।

जोबथारनायाव गोजौनि सावरायनायनिफ्राय जों बुंनो हायोदि बर' थुनलाइआव 1952 माइथायनिफ्राय 1990 मायथाइसिमनि गेजेराव गोबां गागि आरो गागि नडै लिरगिरिफोरनि रेबगननिफ्राय गुबुन गुबुन लाइसि बिसम्बिफोरनि गेजेरजों आरो खायसेया बिजाब महरैबो बायदि थाखोनि बेसेन गोसा खन्थायफोरा जोनोम मोननो खाबु मोनो। बे सम खिनियाव खन्थाय सोरजिजानायनि बिसानखौ नायोब्ला थारैनो बर' थुनलाइनि बाख्रिआव बर' खन्थायफोरनि बिबाडा खम नडा। बै समनि खन्थाय लिरगिरि बिथांमोनहा खन्थाय सोरजिनानै खन्थाय थुनलाइआ जौगानायाव मैखोमैनो बिहोमा होनो हादों होनना बुंनो हायो।